


St. Germ.

147

403 = § Prus.



L. C. W. 1780

Hif. geno.  
Hif. imp. C. 543






CARMEN  
DE PACE  
PUBLICA  
DEO O. M. AUSPICE  
Per Germaniam in Monasteriensis Conventu  
instaurata

Anno CHRISTI cl<sup>o</sup> l<sup>c</sup> L

COMPOSITUM,  
ET NUNC ACCURATIUS RECOGNITUM  
à

JACOBO KÖCKERTO, Lub.

Scholæ Subrectore.



LUBECÆ,

Typis GOTHOFREDI VENATORIS,  
ANNO Æræ Christianæ cl<sup>o</sup> l<sup>c</sup> LIII.



Plurimūm Reverendo, Clarissimo, Ex-  
cellentissimoq; VIRO

Dn. MENONI HANNEKENIO,  
S.S.Theologiæ Doctori celeberrimo, & Ecclesia-  
rum Lubicensium Superintendenti quā fidelissimo  
quā gravissimo,

Admodūm Reverendis, Clarissimis, virtutibus  
& plurimarum artium scientiâ Præstantissimis

VIRIS

Dn. M. ADAMO HELMSIO,  
Reverendi Ministerii Lubecensis Se-  
niori, & templi Petrini

Dn. M. GERHARDO VVIN-  
TERO, templi Jacobini

Dn. M. DANIELI LIPSTOR-  
PIO, templi Cathedralis

Dn. M. JACOBO STOLTER-  
FOTHO, templi Mariani


Dn. JOHANNI ZEIDLERO,  
templi Ægidiani

Pastori-  
bus fi-  
delisfi-  
mis &  
gravis-  
simis,

DN.

Dn. JOHANNI SIBERO,  
Dn. ABRAHAMO LEOPOLDI,  
Dn. M. HUBERTO KOHNIO,  
Dn. JOHANNI NICOLAI,  
Dn. M. JOHANNI VVEBERO,  
Dn. M. JOHANNI REIMARO,  
Dn. ALBERTO BALEMANNO,  
Dn. M. HENRICO ENGENHAGEN,  
Dn. M. ERASMO MOLLENHOFIO,  
Dn. M. GEORGIO DREVENSTEDÉ,  
Dn. JOACHIMO VVENDINO,  
Dn. LUCAE STENIO,  
Dn. M. BERNHARDO KRECH-  
TINGIO,  
Dn. M. JOHANNI REICHIO,

Omnibus & singulis Eccl. Lubec. Ministris, Dnn.  
Fautoribus, Affinibus, Coghatiſ & Amicis meis omni ob-  
servantia & amore etatēm prosequendis



S.P.D.

S. P. D.

**A**rmen quoddam de in-  
staurata per Germaniam Pace  
publica, Plurimùm Reveren-  
de, Clariss. & Excellentissime Dn. Do-  
ctor HANNEKENI, Ecclesiarum Lube-  
censium Superintendentis fidelissimejux-  
tā ac gravissime, & Vos, Admodūm Re-  
verendi, Clariss. Præstantissimi Dn. Pa-  
stores, cæteriq; Symmystæ, Fautores,  
Promotores ac Amici summoperè ho-  
norandi, abhinc biennium, & quod ex-  
currit, hic Lubecæ in Cathariniano Audi-  
torio, vobis præsentibus à me pronuntia-  
tum esse, satis, uti spero, etiam nunc com-  
meministis. Pro qua singulari benevo-  
lentia, quam in me audiendo prolixè tunc  
declarastis, magnas meritò gratias habeo  
atq; ago. Illud autem carmen cùm pri-  
mum

mum horis subsecivis condere animum  
inducerem, non sanè ob vanam ostenta-  
tionem ingenii, quod in me quām pere-  
xiguum sit, ipse met sentio, hoc quicquid  
erat curæ ac laboris suscipiebam, sed quia à  
ratione publici officii mei, quod bonam  
magnamq; partem in excolendo Poëti-  
ces studio consistit, hoc institutum quām  
minimè alienum esse videbatur. Quo no-  
mine deinde etiam partem aliquam poë-  
mati shujus alumnis meæ disciplinæ simi-  
li modo elaborandam in ludo nostrolite-  
rario proposui. Huc accedebat & altera  
causa, incredibile desiderium ac spes Pa-  
cis, quam tot annorum Olympiadas è  
communi nostrum matre Germaniae e-  
xulare unà cum aliis compluribus dolen-  
ter, ut qui maximè, ferebam. Tunc enim  
jamdudum cœptæ erant Monasterii con-  
sultationes de illâ Christiano orbi, cum bo-  
no DEO, restituenda. Quamobrem cùm

) ( 3

alias

alias s̄æpē, tum illo etiam tempore in men-  
tem mihi veniebat celebris illius Hebræo-  
rum adagii :

לא ייחיב המורה בחזים שיבוא באמצע  
הפטירה ברייך כל-פני אשפטו כי לו  
כשתקרב אל-הפטירה !

hocest: Necessarium non est , jaculanti  
sagittis,(sagittario) ut exactè medium sco-  
pi omnibus sagittis arcus sui feriat. Sufficit  
illi , si utcunq; ad scopum appropinquet:  
Ita ego cum Geta servulo Comici Afri,  
*duplici quidem spe utier commodius esse opinabar,*  
verum, si maximè labore illum , qui va-  
riis de causis à me suscepimus erat , summa  
votorum meorum & optatus omnino e-  
ventus non consequeretur , fatis haben-  
dum existimabam , modò aliquam voto-  
rum partem essem assequutus. Nimirum  
quocunq; res Osnabrugæ & Monasterii  
caderet, & , sive eam pax, cuius obtinen-  
da

dæ spes, quemadmodum dixi, aliquanta  
jam tuū ostendebatur, sive diuturnius  
bellum, cuius timor æquè amplius erat,  
excepturum esset, cogitabam fore, ut  
non omnino studii illius & instituti me pœ-  
niteret, sed operæ pretium aliquod etiam  
aliis rectè judicantibus viderer fecisse.  
Posteaquam verò singulari atq; incredibi-  
li DEI O. M. beneficio & immensa cle-  
mentia adeò resredierat, ut spes minimè  
dubia futuræ pacis nobis affulgeret, quam  
exorsuseram telam, studiose atq; multò  
alacrius mihi detexendam, ac poëma il-  
lud ad umbilicum adducendum esse arbi-  
trabar. Cæterum etsi multò quidem tu-  
tius sine controversia fuerat, hunc imma-  
turum & malè natum ingenii mei fœtum  
domesticos intra parietes *ἀνέκδοτον* ac pul-  
vere obductum asservari, quàm eruditissi-  
mi hujus seculi judicio palam exponi,

sua-

suas tamen & autoritate doctissi-  
morum virorum ac discipulorum meo-  
rum rogatu in eam sententiam deductus  
sum, ut hoc qualecunq; *μελέτην* accurati-  
us recognitum in lucem edere & cum a-  
liis communicare constituerim. Increbu-  
it autem jam dudum mos iste, ut, de qui-  
bus optimè sentimus, aut quorum magna  
in nos merita extant, aut deniq; quibus  
pro singulari ac perspectissimâ erga nos  
benevolentia omnia debere nobis vide-  
mur, illorum nomine insigniri scripta no-  
stra cupiamus. Dilipienti igitur diu mul-  
tumq; mihi, quorum nomini inscriptum  
hoc *εὐχαριστὸν* poëma exiret, visum est fa-  
ciendum, ut vobis, Pl. R. R. C. C. E. Præ-  
stantissimiq; Viri, illud dedicarem, quo-  
rum partim arcta affinitate aut propinqua  
cognitione, partim veteri jam indè ab in-  
eunte ætate cœpta, atq; in Academiis ma-  
gis

gis magisq; cultâ firmataq; amicitia me-  
cum conjuncti estis , plerorumq; etiam  
tantis obligatus sum beneficiis, ut in illo-  
rum me ære esse, nec dissolvere posse lu-  
bens fatear. Quamobrem etiam atq; et-  
iam rogo, chartaceum hoc munusculū,  
non quale vobis debebatur, sed quale ego  
mittere potui, ita accipiatis, ut sit perpetu-  
um meæ in vos observantiae studiisq; spe-  
cimen ac monumentum, meq; juxta ac  
meos eadem de cætero, quâ ante hanc di-  
em, benevolentia & favore constanter  
cohonestare dignemini. Dabam LU-  
BECÆ ex meo Φεοντισηγίω a. d. VII. Idus  
Januarias ineuntis anni CHRISTI cī  
loc LIII. quem unà cum plurimis con-  
sequentibus omnino candidum , & , uti  
poëtæ loquuntur, terq; quaterq; felicem  
Ecclesiæ Christianæ , Reiq; publicæ &  
vobis omnibus, vestris deniq; uxoribus  
ac liberis à carcere, quod dicitur , ad me-

b

tam

tam usq; decurrere, & summa  
voluntate opto!

Pl. R. R. G. C. E. & P. P. V. V.

Observantissimus

JACOBUS KOCKERTUS, Lub.

Scholæ Subrector.



JACO-

JACOBUS KÖCKERTUS  
BENIVOLO ELEGATORI  
S. P. D.

Ia ac vetus Ecclesiæ DEI & Christi-  
anarum gentium consuetudo est, eaq;  
jam usq; à primis fermè Israëlitarum du-  
cta temporibus, ut, si quam fortè memorabilem  
victoriam ab hostibus suis obtinuissent, aut, post  
multorum annorum bella, optatâ diu pace vel  
longis à bello feriis potiti fuissent, magno cum  
gaudio & pompâ festum quendam diem cele-  
brarent, in quo publicè DEO O. M. omnium se-  
cundarum rerum autori pro præstitis in Rem-  
pub. meritis ac clementi è periculis liberatione  
gratias agerent. Cum, Mose sanctissimo duce,  
populus Hebræus ex Ægypto ad mare rubrum  
progressus esset, ac immanis & illaudatus ille ty-  
rannus Pharaon perquam magno falcatorum cur-  
ruum agmine & innumerabili pœnè exercitu il-  
los persequeretur, in eas redacti sunt angustias, ut  
omnium vita in extremo discrimine versari atq;  
in acie novaculae quasi constituta esse videretur.  
Retrogredi enim ob hostium adventantium vim  
neutiquam audebant. Ad utrumq; latus præru-

b 2

pti

pti & adscensu insuperabiles montes erant. Ante  
pedes mare Ægyptium, quod transiri omnino  
non poterat. Moses v. precibus hoc impetravit à  
DEO, ut aquæ marinæ diffugerent, atq; utrimq;  
in murorum altissimorum speciem erectæ atq;  
exaggeratæ (o miram DEI potentiam!) consiste-  
rent, & sancta DEI gens sicco pede transiens in ul-  
teriore ripam salva ac incolumis perveniret;  
**Contra** ea, hostes Ægyptii, refluentibus in pristi-  
num locum undis, ad unum omnes obrueren-  
tur, & ita obruerentur, ut ne nuntius quidem tan-  
tæ cladis superesset. Pro qua verè mirabili victoria  
grato animo & ore universa illa gens επινίκιον  
DEO cecinisse legitur. Cum nefario Hamani con-  
filio ac instinctu Aasvverus Rex omnium poten-  
tissimus edictum de delendâ funditus Judæo-  
rum natione ad omnium provinciarum suarum  
præsides misisset, certior ea de re mature facta Re-  
gina Esther a Regem exoravit, ut popularibus illi-  
us parceret, & novis literis priores revocantibus  
securitati illorum consuleret. Quo facto cum Ju-  
dæi ab extrema pernicie liberati essent, ipse verò  
Hamanus suo sibi jumento pestem atq; exitium  
accersivisset, publicæ ac solemnnes feriæ ad red-

in-

integrādam tanti beneficii memoriam, gratiasq; pro e-reptione è periculis Deo agendas à Jūdæis imperatæ ac institutæ sunt. Nos quoq;, qui hac tempestate vivimus, quam obrem pium hoc veterum institutum imitemur, causæ & permultæ sunt & gravissimæ. Quæ enim calamitatum Ilias, irritata & ex ardescente DEI justissimi in nos irâ, ob nostras omnis generis improbitates communem omnium nostrum Parentem Germaniam jam unum & triginta annos & plus eo pœnè oppresserit, quot hominum myriades bello, fame, peste miserè & inauditis exemplis extinctæ sint, quot urbes captæ, dirutæ, ferro ac flammis vastatæ, deniq; in cineres redactæ sint, quanto quām q; assiduo in metu omnes illius incolæ, qui ex hoc communi quasi naufragio erepti interitum ægrè evasimus, versatissimus, animus meminiisse horret, luctuq; refugit. Verum enim verò, seriis ac continuis piorum omnium precibus commotus & expugnatus tandem DEI animus vitiis ille quidem infensissimus, ad veniam tamen resipiscientibus dandam paratissimus consilia in Conventu tam Monasteriensi quām Noribergensi à S. Cæs. Majestatis Magnorumq; Regum.

b 3

ac

ac Rerum publicarum aduceatoribus. Magnis  
diu agitata felici tandem exitu terminavit, & orbi  
Christiano pacem redonavit, quâ nihil salubrius,  
& quâ, quicquid in temporariis bonis pulchrum  
& optabile est, continetur. Pro hoc beneficio, cu-  
jus tanta est magnitudo, ut illi neq; æstimando  
omnis ferè humana cogitatio par, & celebrando  
omne os infans ac hebes esse videatur, DEO. O.  
M. decreto Prudentissimi Senatus nostri, gratias  
publicè & quâm maximâ celebritate die abhinc  
octavo ab Ecclesia actas esse, probè meministis.  
Cæterum ut etiam Schola nostra sibi de hoc tan-  
to DEI beneficio gratulari, ac vota sua cum Eccle-  
siæ votis conjungere videatur, Carmen Euchari-  
sticum de hac ipsa Pace Publica, ac munera hujus  
à DEO nobis concessi magnitudine composui,  
illudq; , DEO volente, cras manè hora IX, in Au-  
ditorio Cathariniano recitare decrevi. Cui rei ut  
Magnifici & Nobilissimi Dnn. COSS. Plurimum  
Reverendus Clarissimus & Excellentissimus Dn.  
Superintendens. Nobiliss. Consultiss. & Experi-  
entiss. Dnn. Syndici & Doctores: Reverendi &  
Clarissimi Dnn. Pastores & Symmystæ: Pruden-  
tissimi hujus Reipubl. Dnn. Senatores ac Secreta-  
rii;

rii : omnes deniq; literarum amantes Cives &  
Studiosi interesse & benivolam aurium operam  
mihi dicare dignentur, eâ, qua par est, observan-  
tiâ, officiosè etiam atq; etiam rogo. P. P. Lu-  
becæ, Anno clo lœc L. pridiè Ka-  
lend. Augusti.

V I R O

Clarissimo & Eruditissimo

J A C O B O K O C K E R T O

adfini suavissimo.

**H**orrida ter denos exercita bella per annos  
In campis, Germane, tuis & viscere regni,  
Attigerunt finem tandem: postquam omne fausto  
Indoluit populi æruinnis, & foedera sanxit  
Arbiter Imperii & septem Regina trionum.

Ex illo nostris rediit pax aurea terris,  
Armaq; ad horrentes derepta reponere muros  
Cœpimus, & pressis amplectier ocia turbis.  
Jamq; iterum renovantur agri, tuti q; pererrant  
Arva greges, lituiq; silent, & classica mussant.  
Addunt se socias paci, gressusq; sequuntur  
Relligio, leges, artes, cœlestia dona.

Hæc tu nunc placidæ decurrens fluminelinguæ,  
Dulcia Phœbæo deducis carmina plectro,  
Pacis amans, Köckerte; & pura mente Jehovæ  
Promeritas grates laudumq; encomia solvis.

At nos arcano perculti pectora motu,  
Multæ Deum rursus repetita voce precamur.,  
Supplicibusq; animi veneramur sidera votis:  
Dum modò coeruleæ sinuosa ad flumina Travæ  
Delecti proceres, & nullius indiga laudis

Pecto-

Pectora conveniunt, paci<sup>q</sup>; imponere morem.  
Soliciti, sat agunt belli præcidere causas.  
Vicinos inter reges, cognataq; regna.

DI faciant, positis irarum fluctibus Ate,  
Exulet, & placido redeat pax candida vultu,  
Litigiiq; expers vivat par nobile Regum,  
Conjunctisq; animis & sancta in fœdera dextris,  
Contra hostes armis, inter se pugnet amore !

F.

JOAN. HENRICUS MEIBOMIUS,  
Reip. Lub. Archiator.

 Uis tunica Martem ferro atq; adamante rigenti  
Contectum, quâ par, dicere voce queat ?  
Quis varias, quibus est Germania fracta, ruinas,  
Hactenus, & sævæ funera mille manus  
Dignè scripserit, & lacrymis æquare dolorem,  
Publica quem nobis damna tulere, sciatur ?  
Tu tamen inventus, Kockerte, poëmate digno  
Fulmina qui duri Martis, & arma canas.  
Nec tamen in belli, tua, tantum incommoda, quin &  
In pacis laudes vena benigna fluit,  
Amissam votis & voce requirere pacem,  
Plebe quis ex ima non solet atq; potest ?  
At Belli æratam, Conversam Pacis in aurum,  
Condigno, faciem pingere posse modo,  
Non nisi, quem docuit Pallas Tritonia, quemq;  
Insignem multa reddidit arte, viri est.  
Adde quod hæc animi grati, quem, Carmine, terris  
Ostendis docto, gratia grata venit.  
Hinc tua, quæ magnis dudum processit ab ausis  
Divitis ingenii, gloria major erit.

Fauori & amico suo singulari  
benevolentia testandæ L.M.Q. faciebat  
HENRICUS VAGETIUS.  
Lon-

**L**onginqui causas belli, & præfigia motus  
Europæ, ac miseranda, tuos, Germania, casus,  
Dein versam in melius sortem, pacisq; reductæ  
Aggredior tenui depromere gaudia versu.  
Copia rerum ingens, per quas tentanda facultas  
Ingenii est tenuis, gravis & labor orsa sequetur.  
Attu adsis, Summi Unigena & Sapientia Patris,  
Divus homo, Pacisq; dator, cui tota per orbem  
Natio Sanctorum hoc Soteria tempore solvit,  
Cui soli calamusq; meus, studiumq; ministrat  
Omne, oris rege plectra mei, da robora cœptis.  
Sic mihi te duce freta ratis vastum aëta per equor  
Sistet inoffensum sperato in littore cursum.  
Vosq; adeò, quorū me hilarem præsentia reddit,  
Magni Amphictyones Patriæ, præclara Senatus  
Lumina, Cæsareæ decora admiranda LUBECÆ,  
Tuq; DEO addicti Præsul primarie cœtus,  
Et patriæ Pharus alta meæ, lux magna tuorum,  
Vos primi pietate viri, multâ arte verendi  
Doctores, omnem celebrati laude per orbem,  
Quos cælo demissa juvat præcepta docere,  
Vel quę Sancta Themis, vel Phœbus prodidit autor,

A

Vos

Vos Patriæ Patrum & sancti pars magna Senatus,  
Quos merita in populum & virtus, generisq; ve-  
tuisti

Nobilitas, & amor Sophiæ alta ad sidera vexit,  
Casurumq; dedit non ullo tempore nomen.,  
Et tu, Castalidum decus ac spes magna, juventus,  
Ne subeat vestras, precor, admiratio mentes,  
Cur ego, cui nunquam Parnassis laurea frontem  
Cinxit, Pierio neq; mens est tincta liquore.,  
Carmine plebejō vestras hīc demorer aures,  
Ledæosq; inter rursum velut anser olores  
Obstrepuisse parem. Nec enim me vana cupido  
Laudis, quam mereor nullam, me judice, movit,  
Sed dudum optatæ communia gaudia pacis,  
Et spe majora ætherei benefacta Parentis  
In civeis, LUBECA, tuos, arasq; focosq;;  
Inq; hoc, quod vario defendit ab hoste, Lyceum:  
Adde quod impositę dudum mihi munia Sparte  
Suaserunt, graviumq; hortamina crebra virorū.  
Hinc nostræ, quāvis rudis est incomptaq;, Musæ  
Acceptum vestris aut non culpabile saltem  
Mentibus officium speravimus esse futurum..  
Quod vobis ita sacratum votumq; putetis,  
Ut stipes quondam nullâ arte politus in agris  
Numinibus.

Numinibus sacratus erat, pietasq; placebat.  
Ergo fortunæ jam jaæta sit alea nostræ. (crem  
Vos, perhororificus quorum me adspectus ala-  
Reddidit, hanc æqui facite, oro, boniç; Camænā,  
Et brevibus placidas advertite cantibus aures.

Quicunq; ille fuit, qui nunquam impunè Come-  
spectatum docuit terris extrema minari, (tam  
Credo equidem, multò magis hunc rata dicta lo-  
cutum,

Quàm quæ Phæbei tripodes vel corniger Ammō

Faticano populis oracula protulit ore.

Hoc exempla probant annalibus cruta prisci

Temporis, & mille historiæ, quas docta vetustas

Prodidit, intexens victuris incluta chartis

Facta, vices varias regnum atq; omina scæva.

Antè per Emathios quàm tristia prælia campos

Julius Ascanii de sangvine cretus Iuli, (rens Pompeii Eg

Omnia qui imperiō tenuit, quà utrumq; recur-

Oceanum spectat Sol, & cognomine Magnus

Pompejus gener adversis instructus Eois

Miscuerunt, Latio Pharsaliaq; arva natârunt

Sangvine, prodigiis cœlum fatiç; sinistri

Ominibus scatuit: micuerunt æthere puro

Fulgura pertacitas non unquam cognita noctes,

Sideraq; & faculæ magnum per inane volantes  
Fulserunt, tristesq; simul præsagiit iras  
Cælestum ardescens horrendo crine Cometes  
Prodigiale rubens, eversum & funditus iri  
Imperium monuit libertatemq; Quiritum.

<sup>β</sup>  
*Augusti Imperatoris.*  
Romano Varus cum primus in agmine duxit  
Tres in Teutonicis legiones perderet arvis,  
Antè graves minitata hominum rerumq; ruinas  
Arsit stella comans, latèq; incendia sparsit.

<sup>γ</sup>  
*Neronis Claudi Cæsar.*  
Quid? quod & incesti sub tempestate Neronis,  
Portenti nulla à vitiis virtute redempti,  
Antè, suo quām se transfigeret ense tyrannus,  
Ignis visus atrox ab Eoi partibus orbis  
Ad latus Hesperium fatales pandere crines,  
Auguriumq; tulit mundo, mox affore tempus,  
Israëlingenūm quo gentem, illustris & alta  
Tecta Palæstinæ niveōq; è marmore structa,  
Atq; auro & gemmis radiantia templa Sionis  
Exitio miles daret, ac fundamine ab imo  
Erueret sanctam disiectis mænibus urbem.,  
Urbem, quâ neq; quid terris speciosius usquam  
Æquore nec Ponti lustraverat auricomus Sol.

<sup>δ</sup>  
*Et item no. tri tempori, nempe*  
Hoc nostro confirmat idem quæ apparuit ævo  
Ante decem liquido trieteridas æthere lampas,  
Quæ,

Quæ, quæ Mænalias cælum consurgit ad Arctos  
Sidus ad Erigones & tardi plaustra Bootæ  
Orta, solo citimum longè super extitit orbem  
Noctivagæ Phœbes, caudâ metuenda minaci.  
Vidimus atrocis flammæ sub imagine virgæ,  
Ingentisve trabis, sed syrmata longa trahentis  
Jactantē, ac damnorū extrema exempla minan-  
Vidimus, eventusq; ratos, veriq; tenaces (tem.  
Expertam(heu!) nimis esse minas Europa fatetur.  
Quippe secuta facem hanic fuerit quam longa  
malorum

Ilias, & latè regiones sparsa per omnes,  
Pœnarum ac facies, & nomina singula dictis  
Prêndere si sperem, aut tenui deducere filo,  
Hellespontiaci numerem prius æquoris algam,  
Ægæiq; maris jactos ad littora fluctus.  
Pauca tamen referam. Rutuli ter Solis habenæ  
Denas plus & eò torsere ex ordine brumas,  
Ac rus vestivit toties ver floribus, ex quo  
Mars ferus, & lacerâ gaudens Discordia pallâ  
Ad superos Stygiis caput exertare cavernis  
Cœpit, & obscurô pacem turbare tumultu,  
Civica Germanos & ad arma coëgit Enyo  
Sangvineum quassans furiatâ mente flagellum,

Comete e-  
jus, qui  
anno 1618  
appare-  
bat.

II.  
Quanam  
calamitates  
illum conse-  
qua sint,  
partim per  
Germaniā,  
scilicet

α  
Horrndū  
bellum.

Qui co[n]mites levis ira, & amor sceleratus habendi  
Insidiæq[ue], Furorq[ue], & plurima mortis imago,  
Ex illô poenæ vitiorum exolvimus acres,  
Debita pro meritis sortiti præmia nostris.  
Namq[ue] salutiferi qui dia Oracula verbi  
Seu peragi à nobis, seu quid mandantia credi  
Sola sequebantur, ( veluti Troezenius heros  
Gnostiados filum ) proram puppimq[ue] salutis  
Humanæ CHRISTUM esse rati vitæq[ue] datorem,  
His interdictum est & aquâ simul ignis & usu,  
His cœlo missos oculis lustrare libellos  
Haud licitum, ac, nisi parerent, horrenda misellis  
Tormina vel præsens mors intentata fuerunt.  
Adde quod impubes pueros seniôq[ue] trementes  
Enfibusatq[ue] sclopis ipsa ante altaria fixit,  
Et dites inopesq[ue] simul, matresq[ue] nurusq[ue],  
Ac charæ infantes genetricis ab ubere raptos  
Mesuit indomitus, dempto discrimine, miles,  
Cædibus ac (miserum!) implevit loca cuncta ne-  
fandis.

Ornatus sancti & pretiosa anathemata templi,  
Pocula adorandæ rubiginis, & sacra vasæ,  
Ex adytis raplere truces aurata latrones.  
Ipsa, DEI cultū quæ relligiosior ætas  
Sacrârat majorum, altis innixa columnis

Templa, hostis flamma violens vastavit & armis.  
Quæ non expugnatæ urbes? quot milite crudō  
Sunt versa in cineres, convulsaq; sedibus imis  
Oppida! quot populati agri! quot diruta regna!  
Nil intentatum liquerunt, nec quid inausum  
Harpyiæ atroces, duri Mavortis alumni,  
Credentes, nullo cœlum rectore moveri,  
Numinaq; aut sensu nullo esse, aut nescia nostri.  
Testis Saxoniæ tu lux quondam, urbium ocelli,  
Cærulus irriguis quas Albis prænata tundis,  
Pulchra situ, differta viris, opibusq; beata  
Parthenope, & Romani eadem speciosa columna  
Imperii, incolmis donec felixq; stetisti,  
Nunc versa in cineres tua culmina nubibus olim  
Æqua, & semirutis pendent deformia tectis.  
Nunc afflita jacest terræ, urbis triste cadaver.  
Quis cædem illius fando, quis funera lucis  
Explicit, admotis tua cum palatia flammis  
Templaq; sacrilegus combureret aurea latro?  
Cum tibi viginti plus millia plebis inermæ,  
Nefrendes pueros, & adhuc opelactis egentes,  
Decrepitosq; ætate senes matresq; nurusq;  
Vulcano ac ferro pariter domuumq; ruinâ.  
Horarum spatio vix septem perderet hostis,  
Perderet,

Perderet, & gladio factos calcaret acervos?  
O scelera horrēda, & cunctis graviora cothurnis!  
Testis tu, Pasevvalcka, potens ut b's mercibus olim  
Atq; vetus, quā setellus Pomerania culti  
Fertilitate soli lætos diffundit in agros.  
O quæ hostis fecit ferus in te exempla! quibusq;  
Affixit miseram pœnis! non secla priora  
Talia viderunt, non nostra antè edidit ætas,  
Ac neq; patrârunt ipsi, gens impia, Turcæ. (lo  
Quis, nisi cui Chalybum rigido sint vincita metal-  
Pectora, non horret tantos meminisse dolores?  
Atq; hæc sævitiae populos exempla per omnes  
Edita sunt, quacunq; patet Germania pugnax,  
Ut vix, qui riguos ferro exercere novales  
Et glebas rastris jam frangere curet inertes,  
Invenias, desintq; manus poscentibus arvis,  
Quæ, lætis ubi riserunt proventibus olim,  
Sentibus obducta in præsens sylvestrib· horrent,  
Et sæva hîc ululant magnorum secla luporum,  
Succrevitq; filix inaratis noxia campis,  
Conflatis dudum in rigidos sicilicibus enses,  
Pilaq; pro rastro jussis tractare colonis,  
Ac patrio in bellum proficiisci rure coactis.  
Hinc neq; longinquis compendia quærere terris

Institor

Institor aut merces potuit mutare viator.  
Innumera& steterunt,& adhuc stant civibus orba  
Oppida,quætām densa olim celebrare virorum  
Visa caterva fuit,capere ut vix posse putares.  
Docti errare inopes, veluti pauperrimus ille  
Arnæus,laribusq; & honorum culmine pulsi.  
Sæpè graves pietate viri ac virtutibus, & quēis  
Plurima canities mento veneranda jacebat,  
Exilio natale solum mutare coacti  
Exangues vultus gessere,ac pallida tristes  
Ora fame,ederunt vulsis radicibus herbas,  
Quæ brutis gratas præberent rectius escas.  
Aut,ubi pane famem vellent explorere cibōq;,  
Et malè morati jejunia pellere ventris,  
Nec quidquam in loculis aliud sibi inanibus esset,  
Quàm vaga quos forsitan pandisset aranea casses,  
Tabifica esurie similes macieq; peremptis,  
Pertusæq; cutem velatos tegmine lænæ,  
Aut Cilicum attritis coopertos corpora saccis  
Æra rogare stipistām sæva subegit egestas,  
Pauperiem ut miseram superare binominis Iri  
Posse viderentur,Lasarive,ante ostia ditis  
Cui domini panis buccella negata secundi est. [est  
Nempè quod Harpyjæ castrenses, quēis lea nulla

B

Nullus

Nullus par feritate lupus, neq; Caspia tigris,  
Per camposq; darent per & urbes funera ferro,  
Replerentq; locos cæde ac terroribus omnes.  
Quid Siculi quondam tale invenere tyranni?  
Quid simile his crudi rabies Busiridis ausa est,  
Hostibus à sævis quæ passa es, Teutona tellus?  
Nam vis, juris erat mensura, repagula legum  
Pugnaci dudum jacuerunt fracta sub ensce.  
Sed neq; damnata harū steterunt in cardine rerum,  
¶  
Pestis. Nec satiata Dei factâ hîc sine ira quievit.  
Dira lues etiam populis Germanidos oræ  
Sæpiùs incubuit, putore infectus & aër  
Mortiferisq; simul spirantes æstibus Austri,  
Sparsaq; sanguineis inhumata cadavera terris,  
Atq; aliæ tulerunt pestis contagia causæ.  
Insedabiliter torri pectora flammis,  
Quas patuli fervens prodebat anhelitus oris,  
Et sitis exurens languentes arida fauces. (letho)  
Indè hominum sine more repens dare corpora  
Corrupti clades cœli: nihil omnibus actum  
Herbarum succis, nil curâ aut arte medentûm,  
Tentâsset frustrâ ipse suas Podalirius herbas.  
Ars jacuit superata malis, horæq; prioris  
Momento incolmis qui lecto assederat ægri,  
Fulmine

Fulmine tanquā ictus, media inter verba repente.  
Semicenis cecidit moriens super ora sodalis.  
O diras clades! ô nunquam credita Teucris  
Supplicia! ô magnas commoti Numinis iras!  
Fando quis expediat cunctas sine fletibus æstus  
Lethiferi vires, moriendi ac mille figuræ,  
Utq; cadaveribus compleverit omnia mœstis  
Pallida Persephone stygiis emissa cavernis?  
Quid loquar Holsatæ notis telluris in oris,  
y  
Obicibus ruptis per apertos æquora campos,  
Eluviones  
maris ac  
fluminum  
inaudita.  
Exspatiata adeò, traherent ut millia secum (que,  
Multæ virūm, segetesq; simul, pecudesq; domos-  
Actanta eluvie populi incommoda ferrent  
Nocte sub obscurâ, quanta ullò tēpore cuiquam  
Vix audita prius, vix visa prioribus ævis.  
Quid tempestates pridem Caurosq; coortos  
d  
Commemorem, stratis à culmine turribus alto,  
Horribiles  
procellæ ac  
grandines.  
Et pecori & sylvis pariter tectisq; sinistros?  
Nuper & exortos insvetæ grandinis imbræ?  
Aut quos præterea infelix Alemannia casus  
Passa fuit longi per tempora mœsta duelli?  
Nam prius auricom lampas circumvaga Phœbi  
Annuabis senis peragrabit mensibus astra  
Cursibus obliquis, quām persequar omnia fando

Nomina pœnarum nota atq; horrenda relatu.  
Ergò, quod eximum pictorum antiqua Timan-  
Fama egisse refert, qui, cū diffideret omni (them  
Exprimere affectus Agamemnonis arte magistra  
Acrius, Iphianassa, tuā de morte dolentis,  
Prudenter pullo patrios velamine vultus  
Texit: idem faciam, tenebrosā & nube silentī  
Velabo reliquas clades miserandaq; fata. [Martis  
*partim hic*  
*Lubeca.* Damna tamen super illa canam , quæ tempore  
Incluta, septenā quæ surgis ad æthera turre  
Urbs LUBECA, tuos doluisti affligere civeis,  
Quorum etsi muros violens haut irruit hostis,  
Turbavitq; focis miseros laribusq; paternis,  
[Acceptum quod jure refers soli ætheris alti  
Rectori, qui te trepidam dubiamq; salutis  
Servavit, diramq; à mœnibus arcuit Aten,  
Ac magnis Patriæ Patribus, prudentia quorum  
Obliquare ratem tantō moderamine scivit,  
Ne convulsam illam decumanis fluctibus Eurus  
Truderet in scopulos & saxa latentia ponto]  
Sæpius at flabris citius furialibus Austri  
Ante expectatum tua confertissimus arva  
Irrupit, dominisq; orbata mapalia miles  
Vasta dedit, ferrōq; agros populavit & igni.

Quales

Quales Pygmæo gaudentes sanguine Thracum  
Cum volucres bifidam sulcant in nube figuram,  
Agmine condensæ tranant vacuum aëra pennis,  
Multaq; se Libyco librant examina cœlo:  
Sic quandoq; tuos tempestas ferrea campos  
Obsedit peragrans, convectatâ undiq; prædâ,  
Ruricolisq; truci, sine causâ, cæde peremptis,  
Ac rapto stabulis armento, impunè recessit  
Improvisa ruens, ad vimq; parata caterva,  
Teutones & ducti Celtarum è gente manipli,  
Quiq; Istrum Rhodanumq; bibunt, Duriumq;

Tagumq;;

Pannones, Etruscumq; genus, duriq; Croatæ,  
Quosq; Alpes misere, & nubifer Apenninus,  
Victricesq; acies Sveonum, ac fortissima bello  
Gens Finni, tantisq; animis venere timendi,  
Vix ope vallorum te ut tutareris, & ipsis  
Murorum septis vix essem libera sævis  
Militibus, penetrare extra ut pomoeria nemo  
Securus, nemo vacuo se credere campo,  
Carpere nedum iter auderet per rura viator.  
Indè tuos munire aditus, attollere moles  
Vallorum ingentes, & circum mœnia fossas  
Ducere præcipites inconsuetâ arte, novôq;

B 3

More

More necesse fuit tantô in discrimine rerum,  
Atq; tuos multô fines custode tueri.  
Indè omne armorum genus, instrumentaq; lethi  
Ex ferrô, & durô Chalybum perfecta metallô,  
Loricam consertam hamis, thoracas ahenos,  
Cum galeis, hastasq; graves, tûm pulvere fætos  
Nitratô flammâq; tubos, tormentaq; cæli  
Æmula fulminibus, celsasq; ruentia turre,  
Quicquid & adversò tutam te præstet ab hoste,  
Provida cura Patrum sibi conciliare coacta est.  
Hinc stat & ad patrios vis præsidaria fines,  
Quæ vigil insidias speculis observet ab altis  
Eminus, atq; hostis studeat deprêndere motus.  
Ne, si fortè tuis turmas advertere portis,  
Etturbare paret nec opinâ hic mænia clade,  
Incustoditam te vel reperiret inermem.  
Hinc urbana tuos vigilum custodia muros  
Servavit, mutansq; vices pro grandibus egit  
Excubias portis, seu nox absconderet umbris  
Terras, seu nitidos Titan ostenderet ortus.  
Quæ quibus impensis fuerint, quantô ære parâda  
Omnia, neu quisquam jurato credere testi,  
Neve satis nostræ nôrint memorare Camænæ.  
Hinc neq; mercator pontum tuus ire per altum

More

More quiit veteri, penetrans neq; sole calentes  
Fors alio terras sperati præmia quæstus  
Repperit, immodicū vel quòd persolvere cēsum  
Portibus innumeris peregrinæ jussus in aetæ est  
Regnum auxilium, vel, quòd Rectorib<sup>o</sup> ampla  
Sæpè tributa tuis at non injusta pependit,  
Attegiæ aut quòd erant flammis hostilibus ustæ,  
Oppidave in planum data, vel viduata colonis,  
Quæs cōportatas hinc atq; hinc vendere merces  
Vel minimò posset, cœu sueverat antè, lucellō :  
Omiseram sortemq; tuam faciemq; LUBECA !  
Quòd si longinqui reputet quis temporis annos,  
Quàm lenis, quàm grata tuis tunc flaverit aura  
Velis, præteritô fuerit quàm prospera seclô  
Sors tua, præsentis faciemq; huic conferat ævi,  
Cogitur anxiferô confixus vulnere mentis (tus,  
Et gemere, & mœstos lachrymis perfundere vul-  
Ni pepo sit pro corde viro, vel cornea fibra,  
Neu fors duritie ferrumq; adamantaq; vincat.  
Non si mille mihi cœlestia Numinia linguas,  
Oraq; Nestoreô tribuant imbuta lepore,  
Ac vocem, Aetæus sibi qualē optavit Homerus,  
Sperem omnes cladesq; tuas & damna referre.  
Qualis, ab Æolio dimissi carcere venti

Balthi-

Balthica rurbanibus cum perflant æquora raucis,  
Ortaq; gliscit hyems, fretaq; indignantia miscet  
Tum, si qua in medio puppis depresa profundo  
Optatos nequiit properè contingere portus,  
Illam huc atq; illuc nunc stridens verberat Auster,  
Nunc agitat gelidi rabies Aquilonis, aquosus  
Nunc parte ex alia Zephyrus ruit imbris atris,  
Innumeri assiliunt fluctus, decimæ impetus undæ  
Undiq; circumstat pinū, undiq; vertere pugnat:  
Sic parte ex omni tua mœnia sæpius, omnesq;  
Horrida promeritos cives exempla, LUBECA,  
Infausti casus, rerum discrimina mille,  
Atq; catenatæ vexârunt undiq; clades.

III.

Commemor-  
vantur cau-  
sa istorum  
malorum  
rum appa-  
rentes seu  
falsa

Quod si fortè sedet causas exquirere rerum,  
Fatalisq; adeò prima incunabula belli  
Discutere, Europam quod se diffudit in omnem,  
Quidve dolens superum Rector tot volvere casus  
Teutoniam impulerit miseram, tot adire labores,  
Rem paucis omnē (nec enim rationis opqrte est,  
Vos modò, quælo, animos auresq; adhibete) do-  
cebo.

Haudequidem ille micans horrendo crine Co-  
metes,  
Pestiferi fuerit quamvis antebambulo Martis,

Ac

Accœdem & motus monstraverit antè futuros,  
Mutuus illius haut adspectus & illius astri,  
Oppositive loci stellarum aut forma trigonos,  
Neu grave Saturni sidus, Martisq; cruenti  
Triste jubar, qui quinq; se abhinc conjūgere lustra  
Visi haut consuetō secla inter plurima ritu,  
Torrida quà rutilant Nemeæi signa Leonis,  
Tantorum autores causæq; fuere malorum.  
Nedum ipse invitox vitæ Servator & Autor  
[Horresco referens] ad atrocia trusserit arma,  
Aut rerum eventus fortisq; volumina nostræ  
Nexu causarum violento inscripserit astris.  
Nam velut Astrologus, qui curâ atq; arte magistrâ  
Et cœlum & stellas, quà quæq; oriturq; caditq;;  
Callet, & excelsæ metitur acumine mentis  
Defectum Lunæ instantem, Solisq; labores  
Prævidet, & certō prænunciat ore futuros,  
Nec facit, ut tales habeant cœlestia motus  
Corpora, nec novit tenebras inducere terris:  
Haut secus astriferō succensa sub æthere lampas  
Triste comans, tacitis surgentia fraudibus arma  
Atq; vices regnis præportat & urbibus hostes,  
Et meritas populis multō pro crimine pænas,  
Non tamen illa bonō jure huic accepta feruntur,

β  
*Oppositus  
planetarū.*

γ  
*Conjunctionis  
magna su-  
periorum  
Planetarū  
qualis pra-  
cedentibus  
annis in Le-  
one fuit.*  
δ  
*Dei immo-  
num decre-  
tum,*

C

Quæ

Quæ bello heu ! minime bello contingere suē.  
Perfida proditio, juris contemptus & æqui, (runt,  
Scupra verecundis indignè oblata puellis,  
Aut immissa sacris inimica incendia tectis  
Templorum, aut facti miserandæ cædis acervi,  
Atq; aliæ scelerum facies & nomina mille.  
Nec, velut Ascræi docuit nos Musa Poëtæ,  
<sup>Pandora  
pixie</sup> Pixide Pandoræ, Lachesis quam sæva Tonanti  
Præbuit, Iäpeto natus cum sidera cælo  
Rapta tulit, dextrâq; Epimetheus deinde reclusit,  
Rursum eruperunt per inane volantia monstra,  
Dira famæ, bella, & morborum mille figuræ,  
Ac ferale malum humanæ Discordia genti,  
Ut misero tanta afferrent incommoda mundo.  
Nec, si fôrs non nemo virûm stimulatus honorū  
<sup>quorundam</sup>  
<sup>Филомат-</sup>  
<sup>хъ.</sup> Ardore, exorti pridem tuba faxq; duelli  
Creditur, ac patriæ sic excusisse quietem,  
Ut Cæsar, caput & Regnator maximus Orbis,  
Imperi reliquiq; Duces, reliquiq; Dynastæ  
Dura vel inviti sint surgere ad arma subacti,  
Hæc vel solatamen vel princeps causa putanda est  
Tantorum, quibus huc pressi sumus usq;, malo-  
ruim.

Sed, si Scripturæ est adhibenda obrussa supernæ,

Si 2

Si verum fas est expromere, Numinis almi  
(Numinis inconniva acie vel nocte videntis  
De mediâ, quæ quisq; gerit, meditatur, aitq;) )  
Abjecta ex animis penitus reverentia nostris,  
Sed damni secura sacræ contemptio legis,  
Pectora sed rebus nimium sublata secundis,  
Sed mentem infatuans fucatâ fronte Voluptas,  
**Consilioq;** inimicabono & docta illice dextrâ  
Innexisse suis nocuos cultoribus hamos,  
Sed fera luxuries, & opum insatiata Cupido,  
Nec non advigilans stupris damnosa libido,  
Et quæ vestibulis Regum foribusq; potentum  
Excubat ambitio, scelerumq; examina plura,  
Africa quâm solet horrificos hum' edere partus,  
Mersere excidio Europæ florentia regna,  
Et tantis totum presserunt cladibus orbem.  
At quaterè horrendū vix iam Bellona flagellum  
Cœperat, humanoq; adsperrere sanguine terras,  
Cum misera heu nostrô, majorum at tempore  
felix

rum Gerlo  
contemptus  
Verbi Des.  
omnis gene-  
ris via,  
Ego.

IV.  
Germania  
Verò tandem  
resipiscens  
veniam à  
Deo impe-  
rat.

Teutonia ad Sanctum est effundere visa querelas  
Numen, & à Superis sese sentire relietam.  
Hei mihi, qualis ea est, heu quantum distat ab illâ  
Teutoniâ, Imperiiq; caput Reginaq; Mundi

C 2

Quæ

Quæ fuit, atq; suis submisit legibus orbem !  
Hæc ubi jam magis atq; magis stellantis Olympi  
Rectorem frendentem irâ, culpasq; perosum  
Sensit, quas meruit scelerata licentia, pœnas  
Exigere, inq; dies tot cladibus addere clades,  
Ærumnasq; , & bella, catenatosq; dolores  
Usq; exaugeri, actantos durare per annos,  
Externata metu, turritos vertice crines  
Effundit, largô lachrymarumq; imbre madentes  
Scissa genas, mæstis plangit sua pectora palmis,  
Calvitiū immundô perfusum pulvere turpans,  
Consilia atq; animo paulatim ad sana reflexo,  
Ardua suspectans superi palatia cœli  
Multa gemit, summiq; inflexo poplite Regis  
Cœlituum folio venerans ad volvitur alto,  
Expandensq; manus, tristi sic ore profatur:  
O Pater, humani generis tutela, Salusq;;,  
[Namq; quis est alius, quem jam implorare que-  
amus?])

Qui tibi subiectum vel nutu concutis orbem,  
Omnipotente illum ceu verbo tute creâsti,  
Qui resipiscentes patriâ complectere curâ,  
Sed pacti temerè abrumpentes fædera punis,  
Quantum illis lenis, tantû his metuendus & asper,  
Ecce

Ecce ego, quæ quondam regnorum maxima,  
mundi

Et decus audibam, ac populos ditione tenebam,  
Occasus quo scunq; videt Titanis & ortus,  
Debeo nunc hosti bellôq; fameq; subacta  
Ludibrium, me atrox qui ab sedibus eruit imis,  
Maturosq; patres, & lectæ robora pubis  
Et strictò intactas hausit mucrone puellas,  
Oppidaq; evertit populatis undiq; campis.  
Quid multa? haut reliquum sibi quicquam fecit  
ad omnem

Sævitiam: ipsa meos horreret Turcia casus.  
Hei mihi! quò priscæ vires? quò nostra potestas  
Decidit! occidimus, de nobis, illicet, aëtum est.  
Et meritò. Nam plura, tua undè exæstuet ira,  
Plura (fatebor enim) quām sit cōprēndere dictis,  
Crimina patravi: nihil intactum ve reliqui  
Aut intentatum sceleris fraudisq; , meo ipsa  
Arguor ore nocens, tua quod præcepta protervè  
Ac vocem aspernata fui. Te digna severo  
Judice culpa, & quam cœlesti fulmen ab arce  
Missum ulciscatur, vel demptò fine pietur  
Carcere Tartareo, mihi conscientia pectora torquet.  
Hinc illæ lachrymæq; , & tot, quib° undiq; vexor,

[Ac meritò, quia spontè nocens] justissime, pœnæ.  
At jam præteritæ damno nunc crima vitæ,  
Queis accensa super tua jure effebuit ira. (rum,  
Heu quām te offendisse dolet Dominumq; seve-  
Munificumq; Patrem! Sed enim te pectore totō  
Pro bonitate tuâ, quæ metæ est nescia, quæso,  
Iræ ponemodum. Quod si præfigere fœdis  
Theta nigrum noxis & justâ debita lance  
Pendere nostra pares, quis vivi ferre tribunal  
Judicis horrendum possit, pœnasq; severas?  
Numquid pax aberit nullô mihi fine carenda?  
Usq; adeone notâ nullâ, nec teste probabis,  
Amplius affectus in te superesse paternos?  
Obone, parce, nec æternūm obliviscere gentis,  
Quam tibi legisti chari de more peculî,  
Sed miseræ planctus, sed deliquisse fatentis  
Innocuo & nixæ cruciati sanguine CHRISTI,  
Respice nunc tandem, & placidô pacem annue  
Desine plagarum, nec inexorabilis Euris (vultu,  
In pontum has rapidis portandas trade querelas,  
Sed longæ requiem pugnæ pacemq; redona.  
Cautior his mens nostra malis delicta deinceps  
Auspiciis vitare tuis pœnasq; parata est.  
Talibus orabat dictis, longosq; ciebat

Multa

Multa gemēns, fletus questusq; Alemannia tellus,  
Seu nigra nox tenebris terras operiret opacis,  
Sive retexisset pulsâ has caligine Titan.

At verò justâ DEUS inflammatus ab irâ  
Irrita vota diu cadere ac sine pondere voces  
Sivit, & in placidas demittere noluit aures,  
Neu gravium ultricem scelerum compescere  
dextram.

Sed populum ærumnis majoribus ursit in horas,  
Hostibus illius patiens impunè licere  
Quælibet, atq; omnē regionem atrocibus armis  
Eruere, & spoliis per vim ditescereraptis.  
Ac velut Ægæo in vasto Marpesia cautes,  
Quæ se, navifragis circumlatrantibus undis  
Undiq;, mole suâ tenet, atq; interrita substans  
Spernit inulta truci allisos cum murmure fluctus:  
Sic DEUS, exeruit commoti ut pectoris æstus,  
Inq; Europam omnes irarum effudit habenas,  
Eheu! tanta ejus lamenta audire negabat,  
Obdideratq; adeò surdas clamoribus aures,  
Nec quidquam ut misericōelos implēsse querelis  
Mœsta videretur, nec quidquam in vota vocasse,  
Atq; isse ardentes extinctum Numinis iras.  
Nec minus intereà, multò gravioribus ægram

Exer-

Exercere DEUS quamvis pergebat in horas.  
Torminibus, justas adeò irritatus ad iras,  
Et causa nunquam non sufficiente subactus,  
Ex mœstis falsos oculis profundere fletus  
Institit, ac votis iratum onerare Tonantem,  
Non ignara, illum, cuius justissima captus (litis  
Facta humiles hominum superant, quandoq; sa-  
Optatum longos producere tempus in annos,  
Idq; sibi placidâ, sine murmure, mente ferendū,  
Urgendasq; preces, si fôrs mora longa trahatur,  
Et citò vota suos nequeant contingere portus.  
Annuitura preci tandem pia Numinia tantis  
Fletibus emollita, catenatisq; querelis,  
Nevem malis fessum dehinc asperioribus orbem  
Affectura, & opem toties propè abesse petitam.  
Illa nec intenues cessit spes irrita Cauros,  
Sed tandem eventus habuere orata secundos.  
Nempe haut æternum sanctæ Deus immemor  
unquam est (dam  
Gentis, quam propriam firmò sibi fœdere quon-  
Delegit, quæq; omnis ei se mancipat uni,  
Etsi ipsa auxilio statuat se Numinis orbam.  
Sed postquam illius gravis ematuruit ira,  
Suppliciis superata admissorumq; pudore,  
Depo-

Deponunt vultusq; minas, & corda residunt.  
Tum neq; Teresiam nec surdum ad vota fuisse,  
Re probat, atq; Patrem præfert, terrore remotō.  
Illiusex facili sanctam miseratio mentem  
Blanda subit, vitæ cum nos malè pænitet actæ,  
Et sedat motos irarum in pectore fluctus.  
Ergo ubi ter denæ fugere ex ordine messes,  
Et toties successit hyems, Alemannia postquam  
Martis pressa jugo veniam pacemq; poposcit  
Regem hominum Superumq; Patrem, miseratus  
Longinquos patrię casus ac tristia fata, [Olympos]  
Totq; fatigatam bellis, & ad ultima lapsam,  
Ac modò non conclamatam vultu adspicit illo,  
Quo cœli templum tempestatesq; serenat,  
Quo rapidas ventorum iras pontiq; remittit,  
Cœlitus his miseram compellans vocibus ultrò: v  
Vox tua jam dudum nostras penetravit ad aures, *Dens pacē  
Germania  
promiss.*  
O dilecta Deo nunquam non Teutona tellus,  
Auxiliumq; meum non cassa in vota vocâsti.  
Hac quæcunq; tenus te sors adversa fatigat,  
Impietas illam meruit tua plurima, finem [plagas  
Quæ superans omnemq; modum tot mittere  
Compulit, invitæq; extorsit fulmina dextræ.  
At vice nunc tandem versâ, miseratus acerbos

D

Tempo-

Temporis exacti casus, ex æthere dextram  
Pōrgam, & votorum mensuram implebo tuorū.  
Ferrea clavigeri compescam limina Jani,  
Et dudum exorti restinguam incendia belli,  
Quæ toties lachrymis, & totâ mente petisti,  
Alma per Europam reparabo tempora pacis,  
Martius in curvam falcem conflabitur ensis,  
Uctuus abjectis populus sibi consulat armis.  
Tu modò ad obsequium, quanta es, componere  
nostrum,

Pœniteatq; adeò Sathanæ mandata sequutam,  
Ne ut flagitiis, neu rursum obstringe piaclis,  
Sed legis tabulas, & vati tradita Mosi  
Aurea verba decem Sinai in vertice montis  
Indefessa dehinc esto servare voluptas, (guem.  
Nec transversum ab eis unquam te moveris un-  
Spes omnes mihi crede tuas, ac nitere CHRISTO,  
Victima pro vestris qui succidanea culpis  
Factus, & una salus hominum & vitalis origo est.  
Hæc ubi dicta, fidem promissis addidit, ipse  
Quod probat eventus, dilapsus nuper & annus,  
Quo rota sedecies centenos annua gyros  
Phœbeæ bis sex peragantis lampadis astra  
Cumq; novem lustris trieterida transiit unam

Pœnè,

VI.  
*Promissa  
perficit.*

Pœnè, salutiferi natali à tempore CHRISTI.  
Nam ter quinta suos ubi lux Octobris ab undis  
Prompserat Eois ortus, (mirabile dictu)  
Pandere sese est visa domus stellantis Olympi,  
Divaq; quam Pacem jucundo nomine dicunt,  
Quæ sœvam ferri rabiem belliq; tumultus  
Compescit, fessis & blanda dat otia terris,  
Per nubes sensim & vacuum per inane deorsum  
Demitti, atq; alas postquam multumq; diuq;  
Incerto nunc huc nunc nisu agitaverat illuc,  
Ad terram labi, & Germana reviser rura.  
Quam gratæ circum Comites, Concordia læto  
Ante iit vultu, lateri secura pericli  
Hæsit blanda Quies, nec non Charitesq; Fidesq;  
Ponè sequebantur Heliconiadesq; sorores,  
Relligioq; & Spes, & Amores mille, Iociq;.  
O felix, ô læta dies ! ô Numine plena !  
Fallor? an implevère domos tūm insueta super-

nas

Gaudia, lætitiaeq; assensu conscius æther  
Arrisit , plausu & fremuit chorus astricus o-  
mnis.

Exultim gelidâ Boreæ sub parte Triones  
Erectis pedibus primi indulseré choreis.

D 2

Et

vii.  
*Lætitia ex  
pacis done  
nata.*

Et stupuit, cursum sua sistere plaustra, Bootes  
Lætus, Parrhasiam tormentorumq; fragore  
Ac clangore tubæ terreri haud amplius Ursam,  
Quiq; duas ingens Anguis disternat Arctos,  
Serpit ovans, radiisq; minus lædentibus arsit.  
Tunc, qui terdenis vocem suppresserat annis,  
Haut mœsta, Eridani ceu quondam in littore, cy-  
gnus

Fudit, inassuetô sed læta melismata ritu.  
Tu quoq; Cassiope, resupino corpore palmas  
Protendens nova tñnc ingenti jubila plausu  
Testata es, rerumq; novum mirata tenorem.  
Tunc Leo respexit, positôq; horrore jubarum  
Diduxitq; ungues, oculis nec torva minatus  
Divæ ab blandiri cœpit, caudamq; ferocem  
Motando allusit. Fòrs & necis ultor herilis  
Mitis adulavit Canis Erigonejus illi,  
Et tremulâ assultans caudâ pedibusq; volutus  
Gannivit. Tunc plectra Lyræ vocalia sensit  
Vultur, at Erigone miseranda ob fatâ parentis  
Funderetum primùm cessavit pectore questus.  
Ipse quoq; arridens, jam non immitis, ut antè,  
Ense cruentatô latus exarmavit Orion.  
Exuit Engonasis Nemeæi terga Leonis,

Suetaq;

Suetaq; depositus nodosæ robora clavæ.  
Crinibus ipsa tuis detrâxti, Ariadna, coronam,  
Adventum gratata Deæ, stabilemq; vigorem.  
Adde quod æthereos lætis hinnitibus axes  
Pegasus implevit volucer, cui dura novellos  
Ungula tentavit calcando inquirere fontes,  
Vellet & æquoreis iterum Delphinus in undis  
Mergi, ac humanæ socius convivere genti,  
Nî fata obstante superûmq; immota voluntas.  
Scorpius at non jam chelis caudâq; timendus  
Amplius, è cœlo venienti brachia Paci  
Contraxit, cessitq; loco. Cephëja vastos  
Andromache Piscis neq; tunc metuebat hiatus.  
Neclætata minus credas quoq; cætera cœli  
Quæ super exustas labuntur sidera terras,  
Et quæ Zona rubens habet, aut declivior Auster.  
Quid vobis animi, Castor, Polluxq; gemelle  
Castoris, ô fratres unâ duo mente, fuisse  
Credibile est, unquam si vos mortalia tangunt,  
Lætitiamne oculis vos declarâsse serenis,  
Et frontes præter solitum exporrêxe putemus?  
Cum jam deposito furibundi Martis amore,  
Tanti Oratores Regumq; Ducumq; potentum  
(Numine cœlesti sic res animosq; regente)

Æternô fidâs junxissent fœdere dextras?  
Nam neq; mistus equo Arcitenens in Scorpion  
arcum.

Direxit, veteri q; citam de more sagittam.  
Libraq;, qsæ novit cunctarum pondera rerum,  
Illô visa die est geminas æquasse bilances.  
Tunc quoq; binorum cœlestia corpora Piscium  
Exercere vagos nitido simul æthere lusus,  
Tunc Caprum, celebre Augusti natalibus astrum,  
Ludere cum socio in numerum Ganymede vi-  
deres.

Singula quid referam? Gaudent Procyonq; Le-  
pusq;;

Mitius & torret subiectos Sirius agros.  
Destitit & nitidum dorso cratera ferentis  
Corvus edax Hydræ discerpere viscera morsu.  
Sic Septem Errones, sic & Lux maxima Mundi  
Cynthius, & totus nova gaudia sensit Olympos.  
O felix! ô læta dies! ô Numine plena!

Nec saltem hæc cœlum mansit fortuna, sed æquè  
Inferior natura vicem ac nova fœdera mundi  
Sensit, & ablatos spatiosi tempore belli  
Jam postliminiò reddi sibi gestit honores.  
Quippè omnes mundi distincto cardine partes  
Unani-

Unanimes miscent felici sidere plausus.  
Indè hominum totum quantum ferè cunq; per  
orbem est,  
Exultat, totâq; fovet nova gaudia mente.  
(Lunicolûm nisi si fòrsgentem exceperis, Orco  
Ortam, & Divini juratam Numinis hostem,  
Casibus insultat quæ sola atq; unica nostris)  
Albis arenosî potor Viadriq; feracis,  
Atq; Istri septem gemini, placidiq; Visurgis  
Accola, grata DEO tribuit præconia laudis,  
Quòd metuens hostile nihil, novatecta, casasq;  
Ædificare iterum, ac flumen populare domorum  
Culminibus passim prævelare ausit amænis.  
Nunc sibi gratatur curvi moderator aratri,  
Quòd deinceps viridi projectus cespite membra,  
Quà curvo trepidare fugax rivo unda laborat,  
Se recreare queat, patulæ aut sub tegmine quer-  
cus

Tutus inabrupto sua credere corpora somno,  
Quòdq; inarata diu proscindere vomere rursus  
Rura ausit; veteri & pro consuetudine curvam  
Maturis falcem sit suppositurus aristis.  
Extremas quisquis lucris pe ductus ad oras  
Ire amat Eöæ mercis mutator & Afræ,

Tuta

Tuta peragraturus ovat prædonibus arva,  
Queisq; mari vitam ventis & credere vota  
Quod soleant, ob piratas invisa fuerunt  
Æquora, nunc tacitas pertentant gaudia mentes,  
Quod modò sint Euris posthac non hoste timenda.

Deniq; Nobilitas, Sacer & cum plebe Senatus,  
Omnis & ordo virum Arcto i sub partibus Orbis,  
Totaq; se longo solvit Germania luctu.  
O felix! ô læta dies! ô Numine plena!  
Mōs erat antiquis, si quando illuxerat Orbi  
Prosperior cum sole dies, quō lætus opacas  
Nuntius expulerat curarum è corde tenebras,  
Hunc cressâ signare notâ, niveôq; lapillô.  
At quis Erythræo tam candidus orbe lapillus,  
Quis tanti candoris onyx, quive unio se unquam  
Obtulit, ut dignâ queat hujus dona diei  
Insignire notâ? vel quis tam expertia vocis  
Ora habet, aut gelidô tam pectora tarda stupore,  
Qui non lætisonâ communia gaudia voce  
Adjuvet, & festos agitet nunc corde triumphos?  
Non sic navifragis littus, non frugibus imbræ,  
Non venti fessis sic tempestate secundi  
Optantur, veluti hæc toti gratia otia mundo.

O felix!

O felix! ô læta dies! ô Numine plena!  
Hanc aliquis Divum summo demissus Olympo  
Si nobis quondam sancto promiserat ore,  
Addubitassemus sponsori credere tanto.  
Dicta fidem insperata levant, crediq; lubenter  
Gaudia præsumpti prohibent inopina timores.  
Hæc illa est, hæc illa dies, quâ , lucelicebit  
Brumali ac sterili sub parte illuxerit anni,  
Aurea nata tamen blandæ sunt germina Pacis,  
Germina, multiplici queis nec virtute medelæ  
Herba vicens omnis certet, non malva salubris,  
Non Panacea potens, non Thessala centaurea,  
Non dulces succi ambrosiæ, serove comantes  
Narcissi, aut molles violæ, neclumina pascens  
Tulparum mirandus honos, benè olensve hya-  
cinthus,

Quotq; dedere olim Pæstana rosaria flores,  
Aut Helicon quicquid plantarum, & Adonidis  
horti,

Thuriferisve tulit Panchäia dives arenis.

O felix! ô læta dies! ô Numine plena!

Quòd si natales anno vertente solemus  
Læti animum celebrare dies, gratesq; Tonanti  
Solvere, præteritum quòd fortunaverit ævum,

E

Quanto

Quantò justa magis, quantòq; valentior almæ  
Christicolum genti causa est jam exorta per o-  
mnem.

Europam, plaususq; novi, gratōq; Tonantis  
Ore celebrandi, cùm longo fracta dolore,  
Et crebris tantum non exanimata periclis,  
Gustatis Lethes rediviva exurgat ab undis,  
Sollicito & positis tandem de pectore curis  
Possit ab annoso jam respirare duello.

O felix! o læta dies! o Numine plena!

Quâ Pax millenis longè anteferenda triumphis  
Orbe redit, rursumq; hilarat mortalia corda.

Quippe obtusa ad eò si quisquam pectora gestet,  
Aut si forte cui tam sit manifesta phrenesis,  
Qui Pacem tumidis neget antistare triumphis,  
Intra se tacitô paulum sub corde volutet,  
Quem victori olim venalis adorea constet  
Cladibus, aut quanto discrimine palma paretur.

Nam campo geminæ cum se explicuere catervæ,  
Et consurgit atrox inter tot millia pugna,  
Utraq; pars dubio primum discrimine fortis  
Rem gerit, in varias glomerantur mutua cædes  
Vulnera, verum unitandem Victoria cedit,  
Quem Deus & virtus palmæ dignantur honore.

Et

Et licet hinc lætans tumefacto pectore vultum  
Diffundat victor, seq; æstimet esse beatum,  
Dum sibi victrices serpunt per tempora laurus,  
Ingeminans &, Iò, populus canitore, triumphhe;  
Gentibus haut tamen hæc communia gaudia u-  
trisq;

Obveniunt, tantoq; magis pars victa gemiscit.  
Ne vetriumphator solidam capit usq; superbus  
Lætitiam, crebro sociatur laurea luctu.  
Est, ut & incautæ noceat victoria turbæ,  
Pristina cum victis incessunt robora pectus,  
Ultima sive acuit virtus extrema timentes.  
Qualia cum per aquas vasa argillacea magno  
Impete concurrunt, ollæq; illiditur olla,  
Dissiliunt fractæ in partes utræq; minutæ:  
Haud aliam dubio quondam certamine sortem  
Terrarum Domini subeunt, communis utrisq;

est

Strages, & victrix simul & pars victa dolendi  
Lugendiq; graves capit ob dispendia causas.  
At sua diffundit gentes Pax dona per omnes,  
Quæ se inter, positô certamine, fœdera jungunt.  
Utraq; pars sacris pariter donaria templis,  
Et promissa DEO gaudet persolvere vota.

Ergo salve, ô læta dies! ô Numine plena!  
Quâ Pax orbe redit, lux optatisima, salve!  
Nullaq; quâ micuit multis formosior annis!  
Cujus & exortu tu gaudes jure, LUBECA!  
Et grates persolvis ovans Regi ætheris alti.  
Nam si, cum liquidis mortalia secla sub undis  
Mersa forent, mirè arboreâ servatus in arcâ  
Ille novi primus veterisq; novissimus orbis  
Incola Noachus structas maestavit ad aras (res,  
Multæ DEO pecorum, gratosq; adolevit hono-  
Tu quoq; ô Urbs sævo servata à Marte LUBECA,  
Urbs nimium dilecta DEO, clementia cujus  
Tetuita est, meritiq; tui omnia pondera longè  
Vicit, age hunc Dominum, Servatoremq; Jeho-  
vam.

Laudibus æternum celebra, gratesq; repende,  
Quod, tibi Palladium divini nobile verbi  
Cùm stygii instinctu latronis, viq; doloq;  
Ereptum toties sævissimus iverit hostis,  
Sic tamen in ventos labor illi cesserit omnis,  
Ut tantis non plus conatibus egerit, ac si  
Ægæum lacerâ transmittere l'ntre parâsset,  
Aut minimo immensum concludere vase pro-  
fundum.

Laudi-

Laudibus hunc celebra, gratesq; repende perennes,

Quòd, duro Europam grassanti Marte per omnē,  
Fluctibus & belli innumerās mergentibus urbes,  
Te spectatricem permiserit esse tumultus  
Tām tragicī, & magnā sine tanti parte pericli,  
Præsidio illius patrocinioq; fideli  
Tuta, per impluvium sub teſto videris imbrēs,  
Atq; necatras orbem vitaveris undas, (nes,  
Laudibus hunc celebra, gratesq; repende perennes,  
Quòd telorum extra jaſtum permanferis, atrox  
Mœnia præteriens nunquam & tua læserit hostis,  
Quòdq; tuos plus ortā inter vice simplice civeis  
Dissidii segetem, quā nulla nocentior altas (est,  
Urbes stravit humi, & quæ, quantū credere non  
Damnorū parit, in primā præciderit herbā.  
Nec dubitare quidem pietas sinit ipsa, supremo  
Quin populi pars magna tui meritasq; Tonanti  
Jam grates laudesq; ferat, sed & ipſe, quòd olim  
Pars populi quotacunq; fuit tranquilla rogantis  
Tempora voce Deum, jam nunc soteria sacro  
Debita cum populo ac gratæ libamina laudis  
Offero, & in tales supplex solvo ora loquelas:  
Sancte Parens (namq; ex vero tibi competit illud

E 3

Seu

VIII.  
Precatio  
pro conser-  
vatione pa-  
ciis.

Seu quod amabilius nomen seu dulcissus usquam  
est).

Summe Parens, vindex scelerum, Autor & unice  
Pacis,

Tu nostra es diris ultus delicta flagellis.

Tu, veluti candente aurum fornace reconditum,  
Longum explorasti vario nos igne malorum.

Justus in nos laxis tua se effundebat habenis  
Ira, libidinibus, vitiorum & mille figuris

Irritata diu, quibus heu sine more modoq;  
Suevimus effreni sanctos offendere vultus.

At patria ac nullis clausa indulgentia metis

Hinc clarè elucet Phœbeò & clarius igne,

Quod tibi, dum in mediò tuus est furor iraq;  
cursu,

Mentibus heu! nostris vixdum ad meliora re-  
flexis

Consilia, irarum satias subit, atq; benignò

Respicis afflitos vultu, noxasq; remittis.

Mites inspirasti animos ac pacis amantes

Induperatori Austriaco, reliquisq; Dynastis,

Consilia atq; horum sic es moderatus & acta,

Ult, quamvis remis velisq; omniq; paratu

Multa reluctatus fuerit rex impius Orci,

In

In Pacis tandem coitum sit amabile fœdus,  
Et Magni inter se, posito certamine, Reges,  
Maximus & Cæsar sancirent fœdus amicum,  
Firmarentq; fidem dextris simulatq; sigillis.  
Cernimus indè tuæ vires ac robora dextræ,  
Et plus quam patriæ immensam bonitatis aby-  
sum.

Ergo tibi, Pater omnipotens, quas pectora pos-  
sunt

Concipere, & quas ora valent depromere, grates  
Ex animo solvunt meritò, quotcunq; per orbem  
Christicolaræ superant, & nos, qui tecta LUBECÆ  
Incolimus: tibi nam in solidum tibi debita laus  
est.

Cœlifluæ nobis veneranda Oracula Legis  
Largè indulsiſti, ex hac ut tua sancta voluntas  
Nota foret cunctis, atq; , in quo cardo salutis  
Vertitur humanæ, CHRISTUS: tua dextera fato  
Urgenti nos eripuit: Tu rura colonis  
Restituens lethi rapuisti è faucibus urbes.

Nam non restaret terræ Germanidos umbra,  
Nî tu, Rex cœli, penitus ruitura subiſſes  
Pondera, quassatamq; ratem, invictâq; levâſſes  
Naufragiū commune manu, Mavorte repulso.

Moenia

Mœnia Cœsareæ sed & hæcc civeisq; LUBECÆ  
Libertate frui sartâ tectâq; dedisti,  
Quæ neq; thesauris Arabum est, charoq; reposti  
Argenti pretio, aut ullo mutabilis aurô.  
Non tuba, non nostros ruperunt classica somnos,  
Tectaq; perstiterunt hostili imperdita dextrâ.  
Hinc collaudat ovans sanctis Ecclesia templis  
Te, nostræ columnen vitæ, Regemq; benignum,  
Et meritas hilari persolvit pectore grates.  
Hæc quoq; gratantum miscens se cætibus almis  
Telætâ Schola voce canit, mediocria nostris  
Quòd concessisti bonus hactenus otia Musis,  
Et fessis tranquilla iterum das tempora terris.  
Atq; ô si nullus deinceps aut Pandarus audax  
Bellandi aut studiis odiôve Tolumnius ardens.  
Hoc benè compositum tentet confundere fœ-  
dus !

O utinam te mente magis magis usq; parati  
Et colere & vigiles benè facta expendere simus,  
Quæ locuplete penu promis sine fine modoq;  
Cœlitus immeritis densoq; fluentia nimbo !  
O utinam (nam cauto opus est, ne rursus ad icta  
Saxa pedem memores referamus, & orbita pri-  
scæ Nos

Nos iterum' culpæ trahat errorisq; relicti )  
Te justam deinceps nunquam inducamus ad  
iram.,

Neve offendamus tām sanctos crimine vultus!  
Sed neq; nos penes est, hominum ô mitissime  
Rector,

Nevem an in nostrâ positum, res condere tan-  
tas.

Pelle igitur nebulas, oculataq; pectora nobis  
Suffice, quæ satis hæc agnoscere munera curent.  
Attritos da animos, dejectaq; corda dolore,  
Ob malè præteriti transmissos temporis annos,  
Corda , quibus spes cuncta tuâ in bonitate re-  
cumbat,

Inq; salutifero cruciati sanguine CHRISTI,  
Cereaq; omnigenæ flesti virtutis in actus  
Largire, & tua quæ currant ad iussa lubenter,  
Sive adversa cadant, seu tempora fortè secunda.  
Religionis opus puræ tutare, furores  
Lunicolæ clemens compescere animosq; tyranni.  
Digna at finitimi da præmia Regibus, horum  
Perstet & æternū firmò respublica talo,  
Consiliis patriam qui suffulserē labantem,

F

Quo-

Quorum & subsidio tantos quæsita per annos  
Teutoniæ fessis Pax tandem est redditæ terris,  
Qui sacrorum interciderat per tempora scho-  
lasq;

Priscus honos, redeat, careant non atria cætu  
Sancta pio, Clarii doctâ nec pube penates,  
Colla diu despecta levent Heliconis alumnæ,  
At fera barbaries stygias trudatur ad umbras.

Non jam ultra in prædam cedat Germania, nec,  
quas

Leges antè dedit, peregrino rursus ab hoste  
Imperiumq; pati cogatur, fronte serenâ  
Tristibus è claustris ausint procedere leges.  
Tu rege, tu claræ Proceres defende LUBECÆ,  
Quos Orchestra tenet, longum studuisse saluti  
Communi valeant, benè de patriâq; mereri,  
Auctibus ut magnis crescat, redivivaq; sumat  
Robora, & antiquos superans juvenescat ho-  
nores.

Deniq; quos tellus Europæ magna veretur  
Regum adamanteis, bone, corda Ducumq; po-  
tentum,

Vinclis & nunquam dirimendo foederæ nece,  
Pax

Pax ut inoffenso perstet modò facta tenore,  
Neve fidem temeret vis aut fallacia pactam,  
Sed sanctè justeq; dehinc lætemur inermes  
Ad legum normam perpendiculumq; tuarum.  
Exigere innocuæ tranquilla silentia vitæ.



... eisemal ob der Zeitung  
vom 1. Februar 1850. Es ist  
die einzige Zeitung die  
in den Jahren 1850 und 1851  
in Berlin erschien.







Hist germ 447

